

■ FORUM

Ina decisiun impurtanta per l'entira Rumantschia

Decisiun dal tribunal federal: Scolaras e scolars che han cumenzà en la 1. classa cun rg ston – er sche la vischnanca ha dentant midà enavos tar l'idom – cuntinuar cun il rg. Cun questa decisiun sustegna il tribunal federal in conclus da la regenza grischuna da l'atun 2011. La decisiun è impurtanta per ils uffants pertutgads en las vischnancas da pionier, per scolastas e scolasts, per ils geniturs, per la regenza grischuna e per il rg – la finala er per l'entira Rumantschia.

Per ils scolars: Els han la pussaivladad da cuntinuar e na ston gia suenter pauc onns instrucziun puspè midar la lingua scritta

Per las vischnancas da pionier: Ellas han la pussaivladad da mussar – almain cun in pèr classas – ch'il rg funcziuna en scola.

Per scolastas e scolasts: Els han da vegnir a frida – en scolas cun pliras classas – cun duas variantas rumantschas scrittas, l'idiom ed il rg.

Per ils geniturs cun dubis: La decisiun po dar la schanza da vesair ch'ils uffants vegnan a frida cun il rg – senza patir donns.

Per la regenza: Sia autoritad e cum-petenzza en dumondas da politica da linguas vegn confermada. La confidenza en sias decisiuns vegn augmentada.

Per il rg: Ses status vegn renconuschì dasper ils idioms tradiziunals.

Per la Rumantschia: La Svizra vesa che la pitschna Svizra rumantscha tschertga soluziuns en ina dumon-

da delicata. La cuminanza viva e debatta.

La decisiun da Losanna sustegna indirectamain er il model da coesistenza idioms e rg. Quel preveda ch'il rg vegn – u sco linguatg d'alfabetisaziun u sco linguatg passiv – en tut las scolas rumantschas. Giuridicamain na stat nagut encunter questa intenziun che vegn er sustegnida da la Pro idioms.

Guardà uschia porta il plogn dals geniturs a Losanna scleriment en in pèr dumondas relevantas.

Bernard Cathomas, Cuira